

# INUIT ATAQATIGIIT

## INATSISARTUNI



12. august 2011

23. januar 2011

UKA 2011/22

UPA 2011/41

Inatsisartut Suleriaasianni § 33 naapertorlugu aalajangiiffigisassatut siunnersuut imaatoq matumuuna saqqummiuppara:

**Inuusuttut innarluuteqartut ukiut pingasut tikillugit efterskolersinnaalernissaat, atuarnermilu ilinniagaqartutut allatulli atugaqarlutillu ilinniagaqarner-siuteqartalernissaat Naalackersuisunit qulakkeerneaqqullugu Inatsisartut aalajangiiffigisassaattut siunnersuut.**

(Inatsisartunut ilaasortaq Juliane Henningsen, Inuit Ataqatigiit)

### **Tungavilersuut:**

Siunnersuut siunertaqarpoq inuusuttut innarluuteqartut inuunerat ineriartornissamullu periarfissaat nukittorsassallugit pitsanngorsassallugillu. Siunertaavoq inuit pineqartut ullumikkorniit pitsaanerusemik ilinniartitaanikkut ineriartornissaannik periarfissinneqar-nissaat. Innarluutilinnut efterskolerialuni aallar-neq ilaanni tassaasarpog ineriartoqqin-nissamut ilinniarnissamullu periarfissatuaq, taamaattumillu tamanna ilinniarnertut allatulli isigineqartariaqarpoq. Ilinniartuunermilu atugassarititaasut nalinginnaasut tamatumani atuuttariaqarput. Ilaqutariit innarluutilimmik meerartallit aningaasatigut artukkerneqarta-riaqanngillat, soorlu aamma ilinniagaqartut allat taamaanneq ajortut. Innarluuteqartoq ukiut pingasut tikillugit efterskolersinnaanissaannik tapiiffigineqarsinnaasariaqarpoq, ta-matumanittaaq ukiumiit ukiumut qinnuteqartarnissaq pinaveersaarneqassasoq isuma-qarpugut. Tassami Danmarkimi atuarmi ilaat ukiuni pingasuni efterskolernissamik neqe-rooruteqartarput. Taamaattumillu naapertuuttuussaaq atuartoq efterskolerialuni aallartik-kuni, aamma ukiuni tulluuttuni atuarnerni-nut tapiiffigineqarnissamik qulakkeerin-nissaat. Tamatuma saniatigut efterskolemi atuartoq ilinniartut allatulli ilinniagaqarner-siuteqartariaqarpoq.

Taamaattorli isertorneqassanngilaq, siunissami ungasinnerusumi kissaatiginarnerpaajum-mat Nunatsinni innarluutilit ineriartoqqiffigisinnaasaannik atuarmeqaqalartuugutta.

Pingaartuuvoq innarluutilit Nunatsinniit efterskolerialartut ilinniartortulluunnit, Nunatsin-nut attaveqarnertik attatiinnassagaat. Pingaaruteqarpoq Nunatsinni innarluutilinnut ilinni-artitaanikkut periarfissakinneq pequtugalugu ima periarfissiinarneq isiginiarneqas-sanngitsoq toqqaannartumik innarluutilinnik Nunatsinniit nassiuuiniarnertut. Allatulli kalaallisut innuttaassuseqarput, taamaattumillu Nunatsinnut attaveqartuaannarnissaat pingaaruteqarluni.

Innarluutilik atuareerluni Nunatsinnut uteruni, pingaaruteqartorujussuuvoq atorfissaqar-tinneqartutut inissaqartinneqartutullu misigisimanissaa. Taamaattumik ullumikkornit pitsaanerusemik innarluutilinnut neqerooruteqartariaqarput, inissatigut, inuiaqatigiinnut akulerusemanikkut kiisalu sapinngisaat naapertorlugu sulitittarnissaat anguniartariaqarl-u-tigu. Taamaallutik inuusuttunnguit inuiaqatigiinni akisussaaqataasutut allatulli misigisi-massappat taamatullu inuiaqatigiit ingerlanerannut tapertaaqataassallutik peqataas-sallutillu.

---

UKA 2011/22

UPA 2011/41

J.nr. 01.25.01/11EM-00022

Qup. 1/3

Siunissami anguniagassatsit ut isumassarsiorfissagut arlaqarput, soorlu [www.livogjob.dk](http://www.livogjob.dk) ilinniartitaanernik immikkut aaqjissuussanik neqeroorteqartartut, <http://www.stubbekoebingefterskole.dk/> il. il.

### **Aningaasartuuteqarnikkut allaffissornikkullu pisortanut kingunerisassai.**

Danmark-imi efterskolernissaq pillugu nalunaarut najoqqutaralugu innarluutillit Danmark-imi efterskolertussat immikkut tapiiffiqineqarsinnaanerannik periarfissaqarpoq. Tamanna Danmark-imi efterskolimiinnermut tapiissuteqartarneq pillugu Namminersorlutik Oqartussat nalunaarutaanni nr. 14, 3. september 2009-imeersumi § 5-imi aamma § 7-imi takuneqarsinnaavoq. Siunnersuulli manna nalunaarummi § 1, imm. 2, nr. 2-p naggataani aalajangersakkap allatut atulernissaanut ersarissumik kaammattuutaavoq. Aalajangersagaq naapertorlugu atuartut Danmark-imi efterskolernissaminnut akuerisaasut ukiuni arfineq pingasuni atuareersimanissaat, 14-ileereersimanissaat, sulilu 18-iliisimannginnissaat piu-masaqataavoq. 18-inik ukioqalersimannginnissamik piunasaqaat ukiut pingasut efterskolerniaraanni malikkuminaatsuusaaq. Taamaammat siunnersuut akuerineqasappat Naalakkersuisut pineqartoq pillugu nutaamik nalunaarusiornissaat pisariaqartussaassaaq.<sup>1</sup>

Siunnersuutigineqartup kingunerisinnaavaa inuit qassiussagaluarnersut, qularnanngitsumilli amerlanngitsut, annertuumik innarluuteqartutut nalunaarsorneqarsimasut Danmark-imi sivisunerusumik efterskolernissaminnut qinnuteqarsinnaalernissaat. Tamanna immini pisortanut immikkut aningaasartuutaasussaangilaq. Taakku nalunaarummi § 1, imm. 1 najoqqutaralugu Danmark-imi efterskolernissamut tapiissutit aningaasanut inatsimmi-immikkoortinneqarsimasut iluanni aalajangersagaq malinneqarpat Naalakkersuisunit akuerineqartarput.

Taamaassappat atuartunut innarluuteqanngitsunut Danmark-imi efterskolertussanut aningaasartuutissat assinganik killilerneqassapput. Danmark-imi efterskolernermut aningaasartuutissanut ukiumoortumik aningaasanut inatsisissap suliarineqarnerani naalakkersuinikkut tulleriiaarisoqartarpoq. Taamaammat pisariaqartitsineq naapertorlugu tulleriiaarinermi siunertamut tassunga annertunerusumik aningaasaliinissamik pisariaqartitsisoqassappat tamanna Inatsisartut aalajangersinnaavaat.

Siunnersuummi anguniakkap atuutilerneratigut atuartut innarluutillit Danmark-imi efterskolertussat ilinniagaqarnermi tapiissuteqarfigneqartarannut aningaasartuutit annertusisussaapput. Pineqartut Danmark-imi ilinniagaqartutut allatut tapiiffiqineqartassappata ilinniarnerminni qaammammut 4.600 kr. pisartagarissavaat. Efterskolertoq atuarnermi akeqanngitsumik ineqartitaappat nerisaqartitaappallu tapiissutit annikillisinneqassapput. Oqarutta atuartut innarluutillit 20-t aaqjissuussinermik nutaamik atuerusuttut ilinniagaqarnermi tapiisutit katillugit ukiumut 1,1 mio. kr.-inik annertussuseqartussaassapput, tamassumalu saniatigut angalanernut il.il. immikkut aningaasartuutissat ilanngut-tariaqassallutik.

Danmark-imut angalanissaq nunallu iluani angalanernut aningaasartuutissat, tassungalugu ilanngullugu efterskolernermut atatillugu aningaasartuutissat inuit ataasiakkaat sutigut qanorlu annertutigisumik innarluuteqarnerat apeqqaatillugu annertuumik nikerarsinnaapput. Assersuutigalugu innarluutillit ilaat angalanermi ikiorteqarnissartik pisariaqartissinnaassavaat, allallu nammineq pisinnaassallutik. Maannakkut ilisimasagut tunngavigalugit tassuuna aningaasartuutissat ersarinnerusumik oqaatigineqarsinnaangillat.

---

<sup>1</sup> *Inatsisartut efterskolit pillugit inatsisaanni § 3-mi qassinik ukioqarnermut piunasaqaatit ilaapput, allatulli iliuseqarsinnaaneranut aalajangersagaqarluni. Tamanna najoqqutaralugu atuartut 18-ileereersimasut Naalakkersuisut maleruagassiornerisigut immikkut ittumik akuerineqarsinnaapput. Atuartut innarluutillit allatut iliuseqarnermut aalajangersakkamut ilaatinneqarsinnaammata inatsisip allanngortinneqarnissaa pisariaqarsorinangilaq.*

Siunnersuutigineqartoq akuerineqassappat qularnanngitsumik Kalaallit Illuutaat, Danmark-imi efterskolertunik siunnersuisartuusut allaffissornikkut suliassinneqarnerussapput, taamatullu Oqaatsinik Pikkorissarfik atuartunik efterskolerniartunik naliliisartoq. Atuartut innarluutillit qassit Danmark-imi efterskolernissaminnut soqutiginnissanersut maannakkut ilisimaneqanngimmat maannakkut allaffissornikkut pisussaaffiit qanoq akeqarumaarnersut, qanorlu annertutigiumaarnersut ersarissumik oqaatigineqarsinnaangilaq. Atuartut innarluuteqanngitsut piffissami tassani ikilinissaat naatsorsuutigineqarpoq, taamatullu allaffissornikkut suliassat annertusinissaat ingasagisassaangitsoq ilimagisariaqarluni. Tamanna Danmark-imi efterskolernissanut atugassat aningaasanut inatsimmi immikkoortinneqarsimasut najoqqutarineqartariaqarnerisigut pisussaassaaq. Kulturimut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup iluani efterskolit pillugit nalunaarutip naleqqussarnissaanut atatillugu allaffissornissap annertusinissa ilimagineqanngilaq, taamaammallu aningaasaliissutit pioreersut iluanni ajornanngitsumik ingerlanneqarsinnaassalluni. Nunatsinni efterskollemik nu-taamik pilersitsinissamut Inatsisartut qanittukkut aalajangigaat, tassungalu atatillugu nalunaarutip naleqqussarneqarnissaata Naalakkersuisoqarfimmi isumaliutigineqarnissaa naatsorsuutigisariaqarpoq.

Ukiuni makkunani inuusuttut ikiliartornerisa nunatsinnilu efterskolersinnaanernut periarfissat amerliartornerisa malitsigisaannik Danmark-imi efterskolernissanut aningaasanut inatsimmi immikkoortinneqarsimasut tamakkiisumik atorineqarnissaasa annikillinissaat ilan-ngullugu ilimagisariaqarpoq.

### **Aningaasartuuteqarnikkut allaffissornikkullu namminersorlutik inuutissarsiuteqartunut kingunerisassai.**

Siunnersuut namminersorlutik inuutissarsiuteqartunut aningaasartuuteqarnikkut allaffissornikkulluunniit kinguneqartussaangilaq.

### **Aningaasarsiornikkut allaffissornikkullu innuttaasunut kingunerisassai.**

Siunnersuut aningaasarsiornikkut allaffissornikkullu innuttaasunut kinguneqartussaangilaq. Siunissarli eqqarsaatigalugu inuit pineqartut ilinniaqqinnissaminnut inerikkiartornissaminnullu periarfissaqarluarnerulernissaannik kinguneqartussaassaaq. Tamassuma saniatigut inuit pineqartut Ilinniagaqarnerisutit pillugit Inatsisartut peqqussutaat nr. 5, 14. november 2004-meersoq, kiisalu Ilinniagaqarnerisutit pillugit Namminersornerullutik Oqartussat nalunaarutaat nr. 8, 27. marts 2008-meersoq najoqqutaralugit ilinniagaqarnerisuteqalernissamut, immikkut ikiorsiissuteqarsinnaanikkut, efterskolersinnaanerminnut il.il. pisinnaatitaalersussaassapput.

Naggataatigut siunnersuutigineqartup Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut, kiisalu Inatsisartut Ilaqutariinermut Ataatsimiititaliannut suliassanngortillugu ingerlatinneqarnissaa siunnersuutigissa-  
vara.